

demerites. Celui qui t'a enseigné l'Alcoran te fera retourner au lieu que tu desires : Dis aux habitans de ce lieu , que Dieu cognois ceux qui enseignent le droit chemin , & ceux qui se deuoyent ; Tu n'attendois pas l'Alcoran , c'est vne grace speciale de ton Seigneur, ne donne point de secours aux infideles , & prends garde qu'ils ne le deuoyent apres auoir compris ce que ie t'ai enseigné, Presche au peuple l'vnité de Dieu , Ne sois pas au nombre de ceux qui croient plusieurs Deitez , n'adore que Dieu seul, il n'ya point de Dieu que lui , toute chose prendra fin excepté sa face, Il commande à toute chose, & tous les hommes seront vn iour assemblez deuant lui pour estre iugez.

*C'est la
Me que,
Voy Ge-
laldin.*

*LE CHAPITRE DE L'ARAGNEE,
contenant soixante-neuf versets,
escriit à la Meque.*

AV Nom de Dieu clement & misericordieux. Je suis Dieu tres-sage. Les hōmes ont crû qu'il suffit de dire, nous croyons en Dieu, & qu'ils ne seroient pas espreuez : certainement Dieu a espreué ceux qui les ont precedez, il a connu ceux qui estoient zelez en sa loy, & ceux qui estoient infidelles. Ceux qui ont mal fait croient-ils éuiter la punition de leur crime & n'estre pas iugez? Ceux

qui esperent de voir Dieu le verront au temps ordonné par sa diuine Maiefté, il entend tout & ſçait tout. Celuy qui combat pour la foy combat pour ſon ame : certainement Dieu n'a pas beſoin des hommes, les pechez ſeront pardonnez à ceux qui croiront en ſa diuine Maiefté & qui feront de bonnes œuures. Nous auons ordonné aux enfans d'honorer leurs pere & mere & de leur faire du bien, ſ'ils te preſſent d'adorer pluſieurs Dieux, tu ſeras damné ſi tu les eſcoute, ne leur obéis pas en cette occurrence, vous ſerez tous aſſemblez deuant moy, ie vous feray voir tout ce que vous auez fait, ie vous recompenseray ſelon vos œuures, & mettray ceux qui auront obſerué ma loy au nombre des bien-heureux. Il y a des hommes qui diſent qu'ils croyent en Dieu, & ſont impatientſ lorsqu'il leur arriue du mal de la part de Dieu pour les eſprouer : ſi Dieu donne la victoire aux vray-croyans, ils diſent qu'ils ſont de leur coſté, mais Dieu ne ſçait il pas ce qui eſt dans leur cœur? il connoiſt ceux qui croyent en ſa Loy & ceux qui ſont impies. Les infidelles ont dit aux vray-croyans, faites cōme nous, ſuiuez noſtre chemin, nous porterons vos pechez; Ils ne les porteront pas, ils ſont des menteurs, ils porteront leurs fardeaux eux-mefmes, ne leur demãdera-t'on pas compte de leurs pechez au iour du Iugemēt? Nous auons enuoyé Noé pour inſtruire les hommes, il a veſcu ſur la terre neuf cens cinquante ans; le deluge a ſurpris & exterminé

terminé le peuple de son temps, parce qu'il estoit iniuste, & auons sauué Noé & ceux qui estoient dedans l'arche avec luy; il doit seruir d'exéple à tout le monde. Souuiens-toy d'Abraham qui a dit à son peuple, Adorez vn seul Dieu & le craignez, vous ferez bien si vous le sçavez connoistre, vous n'adorez que des idoles & n'estes que des menteurs, Ceux que vous adorez ne vous peuuent point faire de bien, demandez secours à Dieu, adorez-le & le remerciez de ses graces, vous ferez vn iour assemblez deuant luy, si vous me dementez, ceux qui vous ont precedé ont cy-deuant démenty les Prophetes messagers de Dieu; les Messagers ne sont obligez que de satisfaire à leur mission, ne sçavez vous pas que Dieu fait mourir les hommes, & qu'il les fera ressusciter, c'est chose facile à Dieu: Cheminez sur la terre & considerez comme Dieu a exterminé ceux qui vous ont precedés, & comme il a créé vn autre peuple apres eux, certainement il est Tout-puissant. Il punit qui bon luy semble & pardonne à qui bon luy semble, vous ferez tous vn iour assemblez deuant luy pour estre iugez; vous ne le rendrez pas impuissant ny en la Terre ny aux Cieux, vous ne trouuez personne qui vous puisse proteger ny deffendre contre sa diuine Maiesté, ceux qui n'obeissent pas à ses commandemens, qui ne croient pas à la resurrection, & desesperent de sa misericorde, ressentiront de grands tourments; Le peuple respondoit, tuez Abraham & le bruslez, mais

Dieu l'a deliuré du feu qu'ils auoient allumé, ce qui seruira d'exemple aux vray-croyans ; il leur dit , vous n'adorez que des Idoles à cause de l'affection que vous auez pour les biens du monde, vous vous mefcognoistrez les vns les autres, & vous maudirez au iour du Iugement , l'Enfer fera vostre habitation, & serez priuez de protection. Loth crut en ses paroles, & dit, ie me retireray au lieu que mon Seigneur m'a ordonné, il est seul tout Puissant & tres-sage. Nous auons donné à Abraham deux enfans, sçauoir Isaac & Iacob, nous auons fait naistre des Prophetes en sa race , & auons enseigné les escritures à sa lignée, nous l'auons recompensé en ce monde, & fera au iour du Iugement au nombre des bien-heureux. Souuiens-toy de Loth qui a dit à son peuple, vous salirez-vous dans vne ordure qui n'a encor esté conuë de personne auparavant vous : vous inclinez à l'amour des hommes, vous volez sur les grands chemins, & vous salissez les vns les autres ; Ce peuple luy respondit , faits nous voir les chastimens de Dieu si ce que tu dis est veritable : alors il dit, Seigneur protege-moy a l'encontre des infidelles : Quand nos Messagers sont venus vers Abraham pour luy annoncer qu'il auroit des enfans ; il luy ont dit, nous ruinerons la ville de Loth , & exterminerons tous ses habitans parce qu'ils sont impies. Abraham leur dit, Loth habite en cette ville, ils ont dit, nous sçauons tout ce qui est dedans, nous le fauuerons avec toute sa

famille, excepté sa femme, elle sera au nombre de ceux qui seront chastiez : lorsque nos Messagers sont arriuez chez Loth, il a esté fasché de n'auoir assez de force pour les deffendre de la malice du peuple, ils luy ont dit, ne crains rien & ne t'afflige pas, nous te sauuerons toy & toute ta famille excepté ta femme, elle demeurera entre ceux qui seront chastiez, nous ferons descendre sur cette ville l'indignation de Dieu à cause de leur impieté, elle seruira d'exemple à la posterité. Nous auons enuoyé Chaib à ses freres habitans de Madian; il leur a dit, adorez vn seul Dieu, craignez le iour du Iugement, & ne salissez pas la terre; Ils l'ont impudemment dementy, mais ils ont esté surpris du tremblement de terre, & sont demeurez morts dans leurs maisons comme des charognes. Nous auons exterminé Aad & Temod, leur ruine paroist encore dans les lieux de leurs habitations, le Diable les a tancez & les a deuoyez du droit chemin encor qu'ils connussent bien leur faute. Nous auons exterminés Caron, Pharaon & Haman, Moïse leur a presché mes commandemens, ils les ont mesprifez & se sont enorgueillis en terre, mais ils n'ont pas euité la punition de leurs crimes : nous en auons chastiez les vns par vn vent impetueux, & les autres ont esté surpris du tonnerre, nous leur auons osté leurs richesses, & ont esté submergez. Dieu ne leur a point fait d'iniustice, ils se sont fait tort a eux mesmes par leur impieté. Ceux qui adorent les

idoles sont semblables à l'aragnée, elle bastit sa maison de sa toile qui ne l'a peut garder du chaud ny du froid; ils n'adoreroient pas les idoles s'ils cognoissoient ce qu'ils font, Dieu void ce qu'ils adorent, il est tout-Puissant & sage: l'enseigne ces paraboles au peuple, & personne ne les comprend que les sages. Veritablement Dieu a créé le Ciel & la Terre, c'est vne marque de sa toute-Puissance aux vray-croyans. Enseigne-leur le liure qui t'a esté inspiré, fais tes oraisons au temps ordonné, les oraisons destournent les hommes du peché, te souuenir de Dieu est la meilleure œuure que tu puisse faire, il sçait tout ce que les hōmes fōt: disputez avec douceur contre ceux qui ont connoissance de la loy escrite, excepté contre les impies qui sont*entre eux; dites-leur, nous croyons en ce qui vous a esté enseigné, & en ce qui nous a esté enseigné, vostre Dieu & le nostre est vn seul Dieu, nous sommes resignez à sa diuine volonté. Nous t'auons enuoyé l'Alcoran comme nous leur auons enuoyé l'ancien Testament, ceux qui sçauent l'ancien Testament croyent en la verité de l'Alcoran, tu ne l'as pas escrit de ta main, si tu l'auois escrit tu aurois inis en doute ceux qui le veulent aneantir; certainement il contient & enseigne intelligiblement les commandemens de la loy, personne ne l'abjure que les infidelles: ils ont dit, nous ne croirons pas en ce liure si Dieu ne fait en luy quelque miracle: dis-leur, les miracles procedent de Dieu, ie ne suis enuoyé que

pour prescher les tourmens de l'Enfer ; Ne leur suffit-il pas que nous t'ayons enuoyé l'Alcoran pour les instruire ? il contient les effects de ma misericorde, & les preceptes necessaires pour leur salut : dis leur, c'est assez que Dieu soit tesmoin de mes actions entre vous & moy, il sçait tout ce qui est au Ciel & en la Terre : ceux qui croient aux Idoles & ne croient pas en Dieu sont gens perdus. Ils te pressent de leur faire voir la punition de leurs crimes, si son temps estoit venu ils l'a ressentiroient bien-tost, ils l'a sentiront lorsqu'ils y penseront le moins, mais ils ne le sçavent pas, ils te presseront de la leur faire voir ; dis-leur, l'Enfer est preparé pour les infidelles : Lorsqu'ils seront plongez dans les tourmens par dessus leurs testes & dessoubz leur pieds, on leur dira : goustez la punition que vous auez meritée. O peuple qui croyez, la terre est assez large & assez spacieuse pour vous esloigner des meschants, n'adorez que moy seul, toutes les creatures mourront, & seront assemblées deuant moy pour estre iugées : Les vray-croyans qui feront de bonnes œures habiteront dans le Paradis où coulent plusieurs riuues, où est la recompense des gens de bien, de ceux qui perseverent à bien faire, & qui sont patients en leur affliction, & qui se confient en leur Seigneur. Combien y a-t'il d'animaux qui n'ont rien pour viure ? Dieu les nourrit & vous aussi, il entend tout & sçait tout. Si tu demande aux infidelles qui a

créé le Ciel & la Terre, le Soleil & la Lune, ils di-
 ront que c'est Dieu : Pourquoi donc nient-ils son-
 vinité? Dieu enrichy & appauvry qui bon luy sem-
 ble, il sçait tout; si tu leur demande qui fait descen-
 dre la pluye du Ciel pour donner vie à la terre apres
 sa mort, ils diront que c'est Dieu; Dis-leur, loüé
 soit Dieu que vous l'aduoüez; neantmoins la plus-
 grande partie des hommes ne le comprennent pas.
 La vie de ce monde n'est que ieu & vanité, la vie
 est dans le Paradis s'ils le sçavent connoistre. Lors-
 qu'ils entrent dans vn navire & qu'ils voyent la tour-
 mente, ils inuoquent vn seul Dieu & protestent de
 professer sa loy, & lorsqu'il les a saueez en terre ils
 sont ingrats de sa grace & retournent dans leur ido-
 latrie, ils connoistront trop tard leur erreur: Ne
 sçavent-ils pas que nous auons estably dans la Me-
 que toute sorte de seureté & de franchise? & qu'on
 rait les hommes à l'entour d'eux pour les tuer &
 pour les faire esclaves? Croient-ils aux choses
 inutiles? seront-ils ingrats des graces de Dieu?
 qui est plus impie que celuy qui blaspheme contre
 Dieu & qui impugne la verité connuë? n'y a-t-il
 point de lieu en Enfer pour les impies? le conduiray
 au droict chemin ceux qui combattront pour la foy.
 Dieu est avec ceux qui font bien.